



# Herremättli-Clique

Sujet 2005

## Peetri hail..... in dr Passarelle fische isch gail!

Unseri neyi Passarelle,  
isch die rainschti Wasserquelle.  
Me ka ebbe-n-emool dert go schwimme,  
in däm dolle Bauwäärgg inne.

Wenn aine e Raisli no Basel macht,  
denn ka-n-är ebbis verzelle,  
bsunders vo dr famoose Bahnhoofspassarelle.  
Mir hoffe fescht, ass d'Zircher das nit wisse,  
sunscht goot's uns glyy dootverschisse,  
denn statt uff Zurzach aabe go kuure,  
kemme si zu uns ko baade und bleed schnuure!

Dr Biggsebach het in sym Sortimänt  
kai Halbschue mee, emänd.  
Daucherflosse und Fischerstiifel,  
ka me kaufe, ooni Zwyyfel.  
In jeeder Greessi Baadeschlabbe,  
vom Glaikind bis zem greeschte Babbe.  
Fir Baadeslip und Schoort,  
muesch zum Badänt Oggsner Sport.  
Au Eelzyyg kasch deert inne kaufe.  
Muesch aaneschwimme, kasch nit laufe.  
Echoloot, Schiffsradaar und Seefunggradio,  
das alles duesch bim Meer-Dia Määrt bikoo.

Bim Laggmerlihuus ka me allem aa,  
d'Gutzi numme no im Bläächdampfer haa.  
Bim Gumpi Zuggerbegg vo Ziri oobe,  
git's numme no Bralynee fir d'Schwoobe,  
gschmaggloos wässrig, pfluuderwaich.  
Die solle's gniesse, mir finde's e Saich.  
Statt Zimmetstäärn und Schoggihäärzli  
het's Seestäärn und Grauwaal mit Wäärzli.  
Bim Faastfuudschopp grad geegeniiber,  
git's Rollmeps und yyleggti Biiber  
mit Seetang als Salaatbyyraag  
und guete Winsch fir dr räschtlig Daag.  
Im Kaffi Spuggdaagoloo  
sinn si au nimm bsunders froo.  
Dr Espresso schmeggst noch Abwäschlumpe,  
me serviert en im-e-ne Literhumpe.  
Und an dr Stell vo Minzete, e,  
git's Algeuffguss, ojeeminee.....  
No Seeroose, Wasserlilie, Lotusblueme,  
ka me bim Bluemelaade guene.  
Uff Droggeblueme darfsch nit hoffe,  
die sinn scho bim erschte Räägeli versoffe.

E hailloosgroosse Wasserschaade,  
het em Eerli-Fiessli si Biecherlaade,  
dr Räschtzeller deert z'biglaage.  
Däschebiecher und diggi Schungge,  
sinn alli zämme im Schlamm versungge.  
Numme hie und doo luegt no ains uuse,  
das isch e Aabligg, s'duet aim gruuse!

Au wenn de sunscht duesch ummegaffe,  
gsehsch, ass si s'Sortimänt dien straffe.  
Statt Grawatte gitt's ney Seemannsgnippel,  
statt Pytschaama, Matroosekittel.  
An dr Stell vo Fryburgerschägge,  
het's fir d'Duurische Wasserschnägge,  
oder bim Alpuffzuug e Seekueh-Daame,  
die passt ussgezeichnet in dä Raame.  
Am Hals e groossi, scheeni Glogge,  
uff dr Stirne gryysleti Logge  
und uff em Kopf e Bluemestruss  
fir d'Japaner, die kemme druss.....

D'eSseLeRGee will persee,  
Rettigsring deert inne gseh.  
Si sinn flyssyg am Iberdängge,  
wo me si am beschte däät uffhängge.

E naamhafti Ädwentscherduuragenduur  
het aagfroggt wäg-e-me Wildwasserparguur.  
Me mecht iiber d'Rollstääge in d'Schalterhalle  
deerfe mit Kajak oobe-n-aabeknalle.  
Im Winter wurd me Yysfallglättere,  
mit Biggel und Sicherigssail, geege s'Aabetschättere!  
Basel-Duurissmuss isch Fyyr und Flamme  
sy maine, die Idee kennt vo iine stamme.....  
Dr Dölf Ogi verzellt in dr UNO scho,  
was fir Aasträngige ass Basel het undernoo,  
zem nääbe Sanggtjaggoob-Pargg und -Areena,  
au no-n-e wyters Sportstättehailait z'ha.....

Im Zolli sinn si richtig nydisch uf d'eSsBeBe,  
e so-n-e scheens Aquarium hänn si no niene gsee.  
Dr Zollidiräggder isch scho am Iberleege,  
eb me nit d'Seelaie kennt in Bahnhoof verleege.  
Ooder ebbe dr Hypo Willi und sy Helvetia,  
denn wääre-n-au d'Zeebra wiider besser draa!  
Vor luter Schiss, är wurd si no alli verdrängge,  
dien si enander scho Schwimmweschte schängge.

Au als Erwyterig vom Vivarium  
wär dr Bahnhoof gar nit so dumm.  
D'Passarelle mit farbigem Koralleriff,  
vyylicht au no-n-e versungges Schiff,  
s'hätt Fyyrfisch, Seestärn und Anemoone,  
Gräbbs wo im-e-ne Schnäggehysli wohne.  
Au Doggterfisch und Flundere,  
kennt me deert biwundere.  
Nur dr Kofferfisch wäär nit z'bistuune,  
in d'Gepägguffbewaarig miesst me dä yyneruume.

Dr Sämi Schmid und dr Keckeis vom Mylidäär,  
leen inspiziere, eb das Gländ nit ebbis wäär,  
zem e Iberlääbensträäningswuuche duure-z'fiere,  
nadyyrlig numme mit Spitzegrenadiere!  
Als Ersatz fir abgschafti Waffeblätz,  
wäär das nit schlächt, oha lätz!  
Z'erscht Fallschirmlandig näbem Wasserduurm,  
durch d'Wolfsschlucht wiehle wie-n-e Wuurm,  
denn s'Gundeli duurgweere bi Nacht und Nääbel,  
ohni Mässer, Gweer oder Sääbel,  
dernoo duur d'Passarelle schwimme oder dauche,  
die ganzi Wuuche nyt zem Rauche,  
und als greenende Heehepunggt,  
dr Centralbahnblatz im greeschte Gschtungg.  
Wär's nit scho voraane uss em Lääbe rafft  
und's bis zem Stroosbuurgerdänggmol schafft,  
dä isch ganz glaar e Rambo par excellence  
und hett in jeedem Dschungelkampf e Chance!

All die vyyle Pändler, woo  
mit droggene Fiess mechte haime koo,  
will s'Rhytaxi, das wär kai Saich,  
schippere vo Glais zue Glais.

Ai Voordail het's, wenn s'Wasser stoht  
kunnsch uff dr Sonderzug no Ziri z'schpoot  
und d'Schrooter kenne in Altstette oobe,  
mit sich sälber ummetoobe!

Doo no aine ganz zem Schluss,  
denn bi-n-i fertig mit däm Schtuss.

Und isch d'Passarelle no so voll,  
mir finde si ainewääg aifach doll.....

*Die ney Waage- und Requisite-Uusstellig  
isch bi dr Kasäärne (samt Baizezält)  
und die alt Laddärne-Uusstellig  
isch allewyyl no uff em Minschterplatz,  
vom Määntig znacht, em 14.Hoornig,  
bis am Mittwuch demorge, em 16.Hoornig.  
D Wäägeler fraie sich uff lire Bsuech.*